

PRIKAZI I OSVRTI

GRAČANIČKI GLASNIK
časopis za kulturnu historiju

Broj 58
Godina XXIX
Novembar, 2024.
[str. 295-297]

© Monos 2024

Arhivski pogledi 4


Časopis Društva arhivskih zaposlenika Tuzlanskog kantona, broj 4, Tuzla 2023, str.177

Društvo arhivskih zaposlenika Tuzlanskog kantona nastavilo je sa izdavanjem stručnog arhivističkog časopisa *Arhivski pogledi*. U njemu su objavljeni radovi izloženi na Međunarodnoj arhivskoj konferenciji pod nazivom “4. Tuzlanski arhivski dani”, održani 29. i 30. septembra 2023. godine u Tuzli. Tema konferencije je bila *Izazovi uspostavljanja sistema zaštite, upravljanja i korištenja elektronskih zapisa*, kao izazov koji se stavlja pred arhive u primjeni novih tehnologija

Izloženo je niz radova eminentnih stručnjaka iz Slovenije, Hrvatske, Srbije i Crne Gore. Cilj konferencije bio je da se kroz izlaganja arhivista iz Bosne i Hercegovine i zemalja regije iznađu optimalna rješenja u primjeni novih tehnologija u arhivskoj praksi. Na konferenciji je predstavljeno ukupno 14 radova na kojima je elaborirana navedena tema. Interesantno je da svi izlagači nisu dostavili konačne verzije svog izlaganja za štampanje u časopisu, zbog čega će čitaoci biti uskraćeni za sveukupno znanje izloženo na konferenciji.

U rubrici “*Arhivistički članci*” objavljeno je pet radova. Prvi je rad prof. dr. Miroslava Novaka iz Maribora, na temu *Digitalizacija procesa u arhivima – savremeni izazovi arhivske teorije i prakse*, u kojem autor obrazlaže upravljanje elektronskim zapisima. Za ovaj posao potrebni su precizni zakonski okviri, odnosno propisi, uz naglasak da su procesi digitalizacije nužni kako bi se lakše upravljalo sa velikim količinama arhivske građe. Autor je koristio brojnu literaturu sa 32 korištena citata iz nje.

Rad Milene Popović Subotić, Arhiv Vojvodine, na temu *Pravni okvir zaštite elektronskih dokumenata u Republici Srbiji*, odnosi se na iskustva pravnog okvira u Srbiji. Njihova iskustva u primjeni koja regulišu svojstva elektronskog dokumenta i njihovo čuvanje tek su na početku što predstavlja izazov za njihovu primjenu u arhivima.



Rad Maruške Nenazić, Državni arhiv Crne Gore – Istorijski arhiv Kotor, *Značaj digitalizacije građe austrougarskog katastra i unapređenje rada sa korisnicima u dokazne svrhe u Istorijskom arhivu Kotor*, bavi se temom o praktičnim iskustvima sa korištenjem digitalizovane građe u dokazne svrhe. To je omogućilo arhivistima da lakše i jednostavnije izađu u susret kako istraživačima tako i strankama.

Slična iskustva izložio je i Adnan Kalesić, Historijski arhiv Sarajevo, u radu *Digitalizacija arhivske građe i informativnih sredstava (iskustva Arhiva Brčko)*. Njegov rad prezentira iskustva na poslovima digitalizacije arhivske građe i njene prezentacije korisnicima. To se odnosi i na digitalizovanu građu i u drugim arhivima koju posjeduje Arhiv Brčko.

U radu mr. sc. Jasmina Jajčevića, Arhiv Tuzlanskog kantona, *Elektronski ili papirni dokument: značaj, prednost i nedostaci?* problematizira se šta je najbolje koristiti i čuvati elektronski ili štampani, papirni dokument. Ta rasprava se vodi godinama među arhivistima cijelog svijeta. Autor iznosi neka iskustva iz svog arhiva.

U rubrici “*Historijska građa*” objavljen je rad mr. sc. Omera Zulića *Doprinos gradonačelnika Ibrahim-bega Džinde u razvoju Tuzle*, Rad donosi iscrno historijsko istraživanje ličnosti iz lokalne istorije austrougarskog perioda koji se odnosi gradonačelnike Tuzle. U njenom razvoju Ibrahim-beg Džindo bio je gradonačelnik Tuzle u dva mandata i to od 1885-1889., i 1893-1897. godine, o čemu nas autor informiše. Za pisanje rada autor je koristio obimnu arhivsku građu, što potvrđuje 51 citat i bibliografija na kraju rada.

U rubrici “*Nova izdanja*”, objavljeno je je 5 radova u kojima su predstavljene publikacije publikovane u 2023. godini a koje su značajne za historiografiju Bosne i Hercegovine. To su radovi: Hatidže Fetahagić *Šerijatski sud u Tuzli (1894-1946) analitički inventar*, JU Arhiv Tuzlanskog Kantona, Tuzla 2023, str. 574, str. 113-115; Dr. sc. Tamara Štefanac *Dokumentiranje i arhiviranje studentskog života*, “Ikarus” Hrvatska, Zagreb 2023, 115 str, str. 116-118; Mr. Milutin Miltojević, *Arhivska građa u teoriji i praksi*, Zbornik radova, knjiga 6, Arhivističko društvo Srbije, Beograd 2023, str. 681, str. 119-124; Adnan Hadžiabdić *Gračanički glasnik*,

časopis za kulturnu historiju, *Ratni zločini nad civilima Gračanice (1992-1995)*, god. XXVIII, br. 56, Gračanica novembar 2023. str. 303, str. 125-128; Prof. dr. Izet Šabotić *Sead Seljubac, Vjerski službenici Vakufskog povjerenstva u Tuzli sredinom XX stoljeća, Muftijstvo tuzlansko i Institut za društvena i religijska istraživanja*, Tuzla 2023, str. 303, str.129-136.

U rubrici "Novosti", objavljene su informacije o arhivskim konferencijama/skupovima u Tuzli, Kuršumlijskoj Banji i Zagrebu.

Časopisa "Arhivski pogledi" našao je mjesto u stručnoj i naučnoj javnosti kako

u Bosni i Hercegovini tako i u regiji. Radovi objavljeni u ovom časopisu treba da postaknu arhivske službe u našoj zemlji i regiji da se pronađu adekvatna rješenja u primjeni novih tehnologija u arhivima. Treba istaći da o kvalitetu i dometu ovog časopisa najbolje svjedoči njegovo indeksiranje i to u bazama: Euro Pub, Erih Plus, ROAD, Slavic Humanittis Index, MIAR i COBISS.BH zbog čega ga preporučujemo na čitanje i ocjenu cjelokupnoj stručnoj, naučnoj i široj javnosti.

Adnan Hadžiabdić